

БАРЧА ИСЛОҲОТЛАР НАТИЖАЛАРИ, АВВАЛО, ОДАМЛАР ҲАЁТИДА ЎЗ АКСИНИ ТОПАДИ

Президент Шавкат Мирзиёевга энг устувор ислохотлар дастурлари ҳамда «Ўзбекистон — 2030» стратегиясини 2026 йилда амалга ошириш бўйича Давлат дастури лойиҳалари юзасидан ахборот берилди.

Қайд этилганидек, мазкур лойиҳалар илгор хорижий тажрибага таяниб мутлако янги ёндашув асосида ишлаб чиқилди. Уларда Президентимиз томонидан белгилаб берилган жорий йилдаги давлат сиёсатининг асосий йўналишлари ва мақсадли кўрсаткичлари ҳамда уларни амалга оширишнинг аниқ механизмлари белгиланмоқда.

Ислохотлар дастурлари ва Давлат дастурининг бир-биридан фаркли жиҳатларига алоҳида тўхталинди.

Ислохотлар дастурлари давлатимиз раҳбарининг халқимиз ва Олий Мажлисга Мурожаатномасида илгари сурилган ташаббуслар ва 2026 йил учун энг устувор ислохотларни қамраб олган.

Булар маҳаллалар инфратузилмасини такомиллаштириш ва уларга Янги Ўзбекистон

қиёфасини олиб кириш, иқтисодиётни технологик ва инновацион ўсиш моделига ўтказиш ҳамда ички бозорда талабни рағбатлантириш, касбларни ривожлантириш ва янги меҳнат бозори архитектурасини яратиш, экологик мувозанатни таъминлаш ва сўдан оқилона фойдаланишни ташкил этиш ҳамда давлат бошқаруви ва суд-ҳуқуқ тизимини такомиллаштириш, жамиятда бирдамликни таъминлаш орқали уни юксалтириш.

Бу дастурларда “хўжжат ишлаб чиқиш”дан “натижага эришиш” тамойилига ўтилмоқда. Ҳар бир ташаббусни амалга ошириш механизмлари ва йил якунига мўлжалланган ижро натижалари бўйича КРІ белгиланган. Дастурлар тўғридан-тўғри амал қилиш механизмига эга ва айрим ташаббуслар бўйича алоҳида ҳужжат қабул қилиш-

ни талаб этмайди. Ҳар бир ислохотлар дастурининг ижроси учун шахсан жавобгар бўлган масъул раҳбар ва мувофиқлаштирувчи давлат ташкилоти белгиланмоқда.

“Ўзбекистон — 2030” стратегиясини “Маҳаллани ривожлантириш ва жамиятни юксалтириш йили”да амалга оширишга оид Давлат дастурида эса стратегиянинг 2026 йил учун белгиланган мақсадли кўрсаткичлари ижроси ташкил этилади. Дастур билан 337 та банддан иборат амалий чора-тадбирлар режаси тасдиқланмоқда. 2026 йилда соҳалар кесимида энг муҳим 59 та норматив-ҳуқуқий ҳужжат лойиҳаси ва энг муҳим стратегик ислохотларни назарда тутувчи 12 та норматив-ҳуқуқий ҳужжат лойиҳаси ишлаб чиқилди.

Лойиҳаларни ишлаб чиқишда жамоатчи-

лик фикрини ҳисобга олишга алоҳида эътибор қаратилгани таъкидланди. Давлат дастури кенг жамоатчилик муҳокамасидан ўтказилиб, 23 январь — 1 февраль кунлари оммавий ахборот воситалари ва интернет тармоқларида кенг тарғиб қилинди. Интернетда лойиҳа билан 5 миллиондан зиёд фойдаланувчилар танишиб, 22 мингдан зиёд фикр-мулоҳаза ва таклифлар билдирилди.

Олийгоҳлар ва давлат идораларида 50 дан ортиқ муҳокама тадбирлари ўтказилиб, 10 мингга яқин талаба, профессор-ўқитувчилар ва давлат хизматчилари иштирок этди. Хориждаги ватандошлар билан ҳам алоҳида мулоқотлар ташкил этилиб, қатор кўшимча ташаббуслар билдирилди.

(Давоми 2-бетда).



ЎЗБЕКИСТОН ПРЕЗИДЕНТИ АМАЛИЙ ТАШРИФ БИЛАН АМЕРИКА ҚЎШМА ШТАТЛАРИДА БЎЛАДИ

Ўзбекистон Республикаси Президенти Шавкат Мирзиёев Америка Қўшма Штатлари Президенти Дональд Трампнинг таклифига биноан 17 — 19 февраль кунлари Тинчлик кенгашининг дастлабки йиғилишида иштирок этиш учун амалий ташриф билан Вашингтон шаҳрида бўлади.

Кенгашнинг биринчи саммити АҚШ Тинчлик институтида бўлиб ўтади ҳамда Ғазо секторини тиклаш ва унга гуманитар ёрдам кўрсатиш, ушбу минтақада тинчлик ва барқарорликни таъминлаш масалаларига бағишланади.

Ташрифнинг ишбилармонлик дастури доирасида давлатимиз раҳбари Американинг етакчи компаниялари ва молия институтлари раҳбарлари иштирокидаги стратегик лойиҳалар тақдимиоти ҳамда иқтисодий соҳага оид икки томонлама ҳужжатларни имзолаш маросимида иштирок этиши кўзда тутилган.

Эслатиб ўтамиз, Тинчлик кенгаши АҚШ Президенти Дональд Трамп ташаббуси билан ташкил этилган. Ўзбекистон жорий йил январь ойда Швейцариянинг Давос шаҳрида унга таъсисчи давлат сифатида қўшилди.

ЎзА.

Тинчлик кенгашининг биринчи мажлиси:

ЎЗБЕКИСТОН КОНСТРУКТИВ ТАШАББУСЛАРНИ ИЛГАРИ СУРИШНИ МАҚСАД ҚИЛГАН

Ўзбекистон Президенти Шавкат Мирзиёев 17 — 19 февраль кунлари АҚШга ташриф буюриб, мулоқотни ривожлантириш ҳамда долзарб глобал ва минтақавий моҳароларни тинч йўл билан ҳал этиш учун кўп томонлама платформа сифатида ташкил қилинган янги халқаро тузилма — Тинчлик кенгашининг биринчи мажлисида иштирок этади.

■ Ташриф олдиан

2026 йил январь ойда Давосда бўлиб ўтган Жаҳон иқтисодий форумида Тинчлик кенгаши таъсис шартномасини имзолаш маросими бўлиб ўтди. Унда давлатлар, ҳукуматлар раҳбарлари ва қатор таъсисчи мамлакатлар вакиллари қатнашди.

Йил бошида илгари сурилган мазкур ташаббус кўплаб давлатлар, жумладан, Кенгаш таъсисчилари қаторига кирган Ўзбекистон томонидан қўллаб-қувватланиб, тинч дипломатия, ҳамкорлик ва халқаро барқарорликни сақлаш учун масъулия таъминларига содиқлигини тасдиқлади.

Тинчлик кенгашининг ташкил этилиши халқаро ҳамжамиятнинг моҳароларнинг олдини олиш бўйича таъсирчан механизмларни шакллантириш ва ҳозирги замон, аввало, Яқин Шарқ минтақасидаги энг ўткир инқирозларнинг сиёсий-дипломатик ечимларини излаш борасидаги саъй-ҳаракатларининг мантиқий давоми бўлди.

Ўзбекистоннинг ушбу ту-

зилмани таъсис қилишдаги иштироки расмий Тошкентнинг мулоқот, халқаро ҳуқуқни ҳурмат қилиш ҳамда куч сценарийларига йўл қўймаслик қояларини илгари суришга қаратилган изчил ташки сиёсатини акс эттиради. Давлатимизнинг БМТ резолюцияларига мувофиқ адолатли ва барқарор тинчлик ечимини қўллаб-қувватлашга асосланган Фаоластин масаласи бўйича позицияси ушбу ташаббус доирасида қўшимча халқаро руҳ олди.

Давлатимиз раҳбарининг Тинчлик кенгашининг биринчи йиғилишида иштирок этиши сўнгги ойларда кузатилаётган Ўзбекистон — АҚШ сиёсий мулоқотининг фаоллашувиغا амаҳорандир. Ўтган ярим йил ичида расмий Тошкент ва Вашингтон ўртасидаги олий даражадаги мулоқотлар сезиларли даражада фаоллашди. Бу икки томонлама муносабатларнинг сифат жиҳатдан янги босқичидан далолат беради.



Ўзбекистон Республикаси Президентининг ҚАРОРИ МУБОРАК РАМАЗОН ОЙИНИ МУНОСИБ ТАРЗДА ЎТКАЗИШ ТЎҒРИСИДА

Кейинги йилларда мамлакатимизда инсон кадри, ҳуқуқ ва манфаатларини таъминлаш, жамиятимизда тинчлик, дўстлик ва ҳамжихатлик муҳитини мустаҳкамлаш, аҳоли, айниқса, эҳтиёжманд тоифаларни ижтимоий ҳимоя қилиш борасида амалга оширилаётган кенг кўламли ислохотларимиз тўғрисида муқаддас ислом динининг инсонпарварлик моҳияти, ўзаро аҳиллик, саховат ва шукроналик қояларини ўзида муҳассам этган муборак Рамазон ойи халқимиз қалбига янада яқин ва мўътабар айёмга айланмоқда.

Ижтимоий-маънавий ҳаётимиздаги ўрни ва аҳамияти тобора ортиб бораётган Рамазон ойини муносиб кутиб олиш ва юқори савияда ўтказиш, диний-маърифий, маданий қадриятларимизни асраб-авайлаш ва улуғлаш мақсадида:

1. 2026 йилда муборак Рамазон ойининг бошланиши 19 февраль кунига тўғри келиши ҳақидаги Ўзбекистон муслмонлари идорасининг ахбороти маълумот учун қабул қилинсин.

2. Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари Дин ишлари бўйича қўмита, Ўзбекистон маҳаллалари уюшмаси, Ижтимоий ҳимоя миллий агентлиги, Ўзбекистон фахрийларининг ижтимоий фаолиятини қўллаб-қувватлаш “Нуроний” жамғармаси ва бошқа ҳамкор ташкилотлар билан биргаликда мамлакатимизда Рамазон ойини **миллий аънава ва қадриятларига мос тарзда** ўтказишга қўлларини қўриб қўйишга асосланган чора-тадбирларни амалга оширсин.

“Рамазон — меҳр-мурувват, аҳиллик ва шукроналик ойи” деган эзгу ғоя асосида: кам таъминланган, эҳтиёжманд, ижтимоий ҳимояга муҳтож инсонларни ҳар томонлама қўллаб-қувватлаш; маҳаллаларни ўзаро ҳурмат, ҳамжихатлик, адолат ва тарбия масканига айлантириш;

ер, сув, ҳаво ва табиий муҳитни асраш, муқаддас қадам-жолар, зиёратгоҳ ва қабристонларни обод этиш;

Рамазон ойи билан боғлиқ тадбирларни исрофгарчиликка йўл қўймасдан, ихчам, мазмунли ва тежамкорлик асосида ўтказишга алоҳида эътибор берилсин.

3. Ўзбекистон Миллий телерадиокомпанияси, Ўзбекистон Миллий ахборот агентлиги ва бошқа оммавий ахборот воситаларига Рамазон ойини ўтказиш билан боғлиқ тадбирларни кенг ёритиш тасвсия этилсин.

4. Мазкур қарорнинг ижросини назорат қилиш Ўзбекистон Республикасининг Бош вазири А.Н.Арипов ва Ўзбекистон Республикаси Президентининг маслаҳатчиси Р.Қ.Давлетов зиммасига юклансин.

Ўзбекистон Республикаси Президенти

Ш. МИРЗИЁЕВ

Тошкент шаҳри,
2026 йил 16 февраль

ЭҲТИЁЖМАНД АҲОЛИНИНГ ИЖТИМОЙ ҲИМОЯСИ ЯНАДА КУЧАЙТИРИЛАДИ

Президент Шавкат Мирзиёев 16 февраль кун Рамазон ойида эҳтиёжманд аҳолининг ижтимоий ҳимоясини янада кучайтириш масалаларига бағишланган йиғилиш ўтказди.

Мамлакатимизда сўнгги йилларда инсон қадрини улуғлаш, аҳолини ижтимоий ҳимоя қилиш ва адолатли жамияят барпо этишга қаратилган кенг кўламли ислохотлар изчил амалга оширилмоқда. Конституцияда мустаҳкамлаб қўйилганидек, Ўзбекистон ижтимоий давлат сифатида фуқаролар фаровонлигини таъминлаш, эҳтиёжманд қатламларни қўллаб-қувватлаш ва жамиятда меҳр-оқибат муҳитини кучайтиришни устувор вазифа деб билади. Мазкур тамойиллар, айниқса, Рамазон ойида янада ёрқин намоён бўлиб, саховат ва ҳамжихатлик қадриятлари амалий ишлар билан мустаҳкамланмоқда.

Давлатимиз раҳбари муборак ойда нуронийлар, ёлғиз ва эҳтиёжманд фуқаролар ҳолидан ҳаёб олиш, оғир аҳолига тўлиб қолган оилаларга амалий кўмак бериш эзгу қадрият эканини таъкидлади.

Йиғилишда шу мақсадда ишлаб

чилган “Рамазон — меҳр-мурувват, аҳиллик ва шукроналик ойи” широи остидаги комплекс чора-тадбирлар тўғрисида ахборот берилди. Уларни амалга ошириш учун “Вақф” хайрия жамоат фондига 750 миллиард сўм ҳамда Ижтимоий ҳимоя миллий агентлиги орқали 300 миллиард сўм ажратиши белгиланди.

Ажратиладиган маблағлар ҳисобидан эҳтиёжманд оилаларга бир марталик моддий ёрдам кўрсатиш, ногиронлиги бор шахсларнинг даволаниш ва жарроҳлик амалиётлари харажатларини қоплаб бериш кўзда тутилган.

Президентимиз жорий йил январь ойида ўтказилган видеоселектор йиғилишида бугун турли радикал ва экстремистик ғоялар ахборот технологиялари орқали ёшларимиз онгини заҳарлашга уринаётгани, фақат жазо ва тақиб билан бу муаммони ҳал қилиб бўлмаслигини таъкидлаган эди.

Айни дамда Президентимиз жамият

оналари ва келажақ авлод тарбиячилари бўлган хотин-қизларни бузғунчи ғоялар таъсиридан асраш, уларни ҳам маънаван, ҳам моддий қўллаб-қувватлаш масаласига алоҳида урғу берди.

Бу жараёнда ёт ғоялар таъсирига тушиб қолган шахсларни ижтимоийлаштириш, моддий қўллаб-қувватлаш, уларнинг оилалари билан индивидуал тарзда ишлаб, тиббий ва психологик ёрдам кўрсатиш ҳамда касб-хунарга ўргатиш орқали бандлигини таъминлаш зарурлиги кўрсатиб ўтилди.

Президентимиз ҳар бир маҳаллада эҳтиёжманд оилаларнинг аниқ ва шаффоф рўйхатини шакллантириш, ёрдамларни фуқароларнинг дини, миллати ва ижтимоий келиб чиқишидан қатъи назар, тенг ва адолатли тарзда етказиш шартлигини алоҳида таъкидлади. Масъул идораларга бу борада қатъий назорат ўрнатиш топширилди.

ЎзА.

ҲАМКОРЛИК ДАСТУРИ ДОИРАСИДА АЛОҚАЛАР МУСТАҲКАМЛАНАДИ

Олий Мажлис Сенати Раиси Танзила Норбоева БМТ Аҳолишунослик жамғармаси — UNFPAнинг Ўзбекистондаги ваколатхонаси раҳбари Нигина Аббосзода билан учрашди.

Мулоқот

Мулоқот давомида UNFPAнинг демографик сиёсат, репродуктив саломатлик ва гендер тенглик соҳаларида олиб бораётган амалий кўмаги ҳамда БМТ тизимидаги ишончли ҳамкор сифатидаги аҳамиятига урғу берилди.

Шунингдек, мамлакатимизда илк бор ўтказилаётган аҳоли ва қишлоқ хўжалигини рўйхатга олиш тадбирида жамғарма томонидан жалб қилинган халқаро экспертлар ва кўрсатилаётган услубий ёрдамнинг муҳимлиги қайд этилди.

Томонлар 2025-2026 йилларга мўлжалланган ҳамкорлик дастури

доирасида қонунчилик ташаббусларини ишлаб чиқиш, онлайн ҳамда гендер зўравонликка қарши курашиш, миллий тадқиқотлар ўтказиш ва оилага йўналтирилган сиёсатни ривожлантириш йўналишларида алоқаларни янада кенгайтиришга тайёрглигини билдирди.

Учрашув якунида стратегик шерикликни мустаҳкамлаш ҳамда аҳоли турмуш сифатини кучайтиришга қаратилган қўшма дастур ва лойиҳаларни амалга оширишдан томонлар манфаатдор экани таъкидланди.

Олий Мажлис Сенати Ахборот хизмати.

Сиёсий партиялар фракцияларида

ДОЛЗАРБ ҚОНУН ЛОЙИҲАЛАРИ МУҲОКАМАСИ

Сиёсий партияларнинг Олий Мажлис Қонунчилик палатасидаги фракцияларининг йиғилишлари бўлиб ўтди. Уларда қуйи палатанинг навбатдаги мажлиси кун тартибига киритилиши режалаштирилаётган қатор қонун лойиҳалари кўриб чиқилди.

Тадбиркорлар ва ишбилармонлар ҳаракати — Ўзбекистон Либерал-демократик партияси фракцияси йиғилишида Президентимиз раислигида тармоқ ва ҳудудларда юқори иқтисодий ўсиш суръатларини таъминлаш бўйича асосий вазифалар муҳокамасига бағишлаб ўтказилган видеоселектор йиғилишида илгари сурилган муҳим ташаббуслар ҳақида сўз юритилди.

Таъкидланганидек, инвестиция лойиҳалари билан ишлашда янги ёндашув жорий этилиши бугунги замоннинг ўткир талабидир. Эндилликда лойиҳалар нафақат ишга туширилиши, балки юқори қўшилган қиймат яратиши, ташки бозорга чиқиши ва барқарор иш ўринларини таъ-

минлаши асосий мезон бўлади. Бу жараён “Ягона миллий лойиҳа бошқаруви” платформаси орқали уч йил давомида мониторинг қилиб борилади.

Депутатлар экспорт масаласига стратегик нуқтаи назардан ёндашиш зарурлигини таъкидлади. Ички бозор ҳисобидан юқори ўсишга эришиб бўлмаслиги, шу боис янги маҳсулотлар билан Европа ва АҚШ каби қimmat бозорларга чиқиш зарурлиги қайд этилди.

Фракция аъзолари давлатимиз раҳбари ташаббусини мамлакатимиз экспорт салоҳиятини оширишда муҳим қадам сифатида қўллаб-қувватлади.



